

इराद

दीना नाथ नाँदिम

वुशुन वुशुन, व्वजुल व्वजुल, व्वजुल व्वजुल, वुशुन वुशुन
वुशुन व्वजुल, व्वजुल वुशुन छु खून म्योन
जवान छुस तुफान ह्यू जनून म्योन

मे शोक छुम कॅशीरि प्यठ फिदा गछुन तु जान द्युन
बु वाव छुस मे क्याह कर्यम यि आवलुन, यि आवलुन
मलख बॅनिथ पज्या डलस अंदर बिहुन, खॅटिथ बिहुन
बनुन छु युप, दुशमनस छु द्युन लहुन, छु द्युन लहुन
तवय तवय वुशुन व्वजुल छु खून म्योन

बु शाद छुस करुन वतन आज़ाद छुम, आज़ाद छुम
कॅठ्युश कॅडिथ करुन चमन आबाद छुम, आबाद छुम
वदुन रिबुन पॅतिम ति वारु याद छुम मे याद छुम
नोवुय मे जोश छुम नोवुय इरादु छुम मुराद छुम
तवय तवय वुशुन व्वजुल छु खून म्योन

दजुन, दॅजिथ ग्रजुन मे कोर इशारु नारु वुजमलव
तलुक प्यटुक मे बोव सीर बेकरार ज़लज़लव
रगन मे खून बोर नोवुय, शॅहीद मज़ारु क्यव गुलव
शिहिन्यु व्वफुन मे होव, ज़्यव मे अॅन्यु बहारु बुलबुलव
तवय तवय वुशुन व्वजुल छु खून म्योन

यॅबुरज़लन तु सुम्बलन, अॅछन छु नोव खूमर ह्यू
गॅरीब ग्रीस्तिस करान अॅमीर ज़ारु पारु ह्यू
बुडिथ, व्वमेदनुय छु ल्वक़चार, नोव बहार ह्यू
दिलस अंदर मे गिंन वलवलाह छु बेकरार ह्यू
तवय तवय वुशुन व्वजुल छु खून म्योन

दज़ान छि म्यॉन्यु वन, यियम करार क्याह, करार क्याह
रिवान छी म्यॉन्यु गुल, यियम मे वार क्याह मे वार क्याह
बु कौंसलन तु फॉसलन ति गिंरु क्याह, बु गिंरु क्याह
तुलुन मे नार छुम, कर्यम मे नार क्याह, मे नार क्याह

तवय तवय वुशुन व्वजुल छु खून म्योन

इरादु छुम बु हावु यावनुक बहार आलुमस
बु सौतु वावु पौठ्य करु जिगर निसार आलुमस
रंगन बु पनुनि खून, खारु म्वल बु वारु शबनमस
बैनिथ बुन्युल तु नार करु बु लारु लारु दुशमनस
तवय तवय वुशुन व्वजुल छु खून म्योन

★ ★ ★ ★ ★

बु ग्यवु नु अज

दीना नाथ नौदिम

बु ग्यवु नु अज

गुलन तु बुलबुलन तु सुम्बलन तु मसवलन
हुंदुय खुमारु होत, तु मारु होत
मोदुर मोदुर तु नेंदरि होत, सु नगमु कांह
बु ग्यवु नु अज सु नगमु कांह
ति क्याजि अज ति क्याजि अज
गुबारु गर्द जंगुची खटन छि रंग मसवलन
तु दुह्य बुशंगु जंगुकी चटान छि चोठ बुलबुलन
तु सुम्बुलन अपौर्य यपौर्य गछान छ्वनिय छु हाँकुलन
तु वजमलन बिहिथ अँछन छु जाल ज़न
खँटिथ छि कोह तु बाल
तु कालु औबुर संगरन वँलिथ छु नाल ज़न
बु ग्यवु नु अज
तिक्याजि अज छि जंगबाज जालसाज होल गँडिथ
वँशीरि म्यानि ज़ाग ह्यथ

बु ग्यवु नु अज

बु ग्यवु नु अज, निशात, शालुमौर, आबशारु लालुजारुकुय नर्म नर्म पिशुल पिशुल
तु सब्ज सब्ज शबनमुक सु नगमु कांह
ति क्याजि अज, ति क्याजि अज
बे वायि जायि जायि तापु क्रायि ज़न छि ज़ाग ह्यथ
करान छि आयि ग्रायि युथ च़लन यि म्योन बाग ह्यथ
तवय छु शाह अँदुर्य गोमुत गुलन छि लालु दाग ह्यथ

ज्वयन छु गुंगुरायि प्यठ ति पॅहर ज़न
स्वतेयि कुकिलि वाह, तु ब्यूठ हारि वनुचि अँहर ज़न
बु ग्यवु नु अज़
तिक्याज़ि अज़ छि जंगबाज़ जालसाज़ होल गँडिथ
वॅशीरि म्यानि ज़ाग ह्यथ

बु ग्यवु नु अज़
बु ग्यवु नु नव बहारु बालु यारु के अमारु कुय रंगाबु रंग व्वजुल तु होर
न्यूल सबज़ तोत तु शोख नगमु कांह
बु ग्यवु नु अज़ सु नगमु कांह
ति क्याज़ि अज़, ति क्याज़ि अज़
बहारुसुय छि लार हर्दु वावु के ज़हारुची
वनन अंदर अवारु ताज़ु शूविया छि नारुची
सखर छि आदुमस ति आदमी सुंदे शिकारुची
यँबुरज़लन तवय टॅपिस छि बनु गॉमुन्न
हवा छेनिथ प्योमुत, तु ही छी थरि बिचारि छ्यनु गॅमुन्न

बु ग्यवु नु अज़
बु ग्यवु नु अज़ खाहन खलन तु डूरिनय
अंदर सु दांदु वॉल्यु हॉल्यु सुंद,
न्यंदन हुंदुय सु गुमु बॅरिथ ति नगमु कांह
बु ग्यवु नु अज़ सु नगमु कांह
ति क्याज़ि अज़ तिक्याज़ि अज़
खाहन छु लावि न्याहलि लावि दावि जुव न्युमुत
खलन छु हालुवन हुंदे यिनुक ति पॉरु ज़न प्योमुत
ड्यकन प्यठुय छू खोफु सुत्पु गुमु ज़न शिठिथ गोमुत
पला छु आवुलुन च्वपॉर्यु गथ करान
तु गासु तान्यु क्रोट्यव, क्रोटिथ मूलु ज़न छु रथ हरान
बु ग्यवु नु अज़
तिक्याज़ि अज़ छि जंगबाज़ जालसाज़ होल गँडिथ
वॅशीरि म्यानि ज़ाग ह्यथ

बु ग्यवु नु अज़, बु ग्यवु नु अज़
तोताम, योताम नु
कोह तु बाल, खअह तु डूर्य, गुल तु पोश, ज़ग तु तौन,
कुमिर तु कुकिलि बोल बोश, हरुद तु सौंत, वन तु बाग,

ज्वयि तु आब, ही ग्वलाब,
शालुमार, लालुजार, आबशार, नव बहार,
जोजिबाल, बुरजुबाल, नंगुबाल, शीशिनाग, वावजन,
वारु कारु खोफु रोस्त, तु पँहरु रोस्त तु अँहरु रोस्त
बु बेयि वुछख
तु छिम्बरु मेलुवुन, सुली, सुली, सुली
इरादु म्यॉन्यु बेयि असन, लसन बसन
तु रथि खसन मुराद म्यॉन्यु
तु टोठ म्योन, नुंदबोन, बाग सोन, योहय पनुन पनुन वतन
यि बेयि वुछन
आबाद, आजाद तु ख्वश यिवुन, बहार ह्यू, तु लोव ल्वकुचार ह्यू

बु ग्यवु तेली, बु ग्यवु तेली
तु सोंतु फुलयि मोत गँछिथ, बु ग्यवु तेली
नतु तोताम ग्यवु नु, ग्यवु नु ज़ांह
सु नैदरि होत, खुमारु होत, बु सोज़ कांह
तवय बु नेरु, अज़ बु नेरु, वथ बु शेरु
बँठ्य तु बेरु सँम्यु करख
बु नेरु तेज़ नौव कलम तु श्राख ह्यथ
तु दुशमनन तु रँहज़नन बु नेरु फेरु ठाख ह्यथ
ड्वकुर कलम तु द्रोत ह्यथ, इरादु वोत गींत ह्यथ
बु फेरु जायि जायि शायि शायि पनुनि आयि
थिं बलायि द्रोत ह्यथ, ड्वकुर कलम तु द्रोत ह्यथ
रुमव रुमव बु गुमु वँडिथ, छलन यि टोठ बाग सोन
यि नुंदबोन, बालुयार, ल्वकुचार, चोन म्योन
तु खोह तु खयि, ख्वड तु लयि, बु नूर सुत्यु पूरवख
बु ग्यवु नु अज़
बु नेरु अज़, ड्वकुर कलम तु श्राख ह्यथ
इरादु अख बे बाक ह्यथ।

★ ★ ★ ★ ★